

彭剛直公奏稿

彭剛直公奏稿卷之三

會覆欽廉進兵摺 光緒十年三月十四日

奏為遵

旨酌度方長華一軍已由南甯迅赴關外礙難由欽靈前進恭摺覆陳仰祈

聖鑒事竊於光緒

十年二月十三日承准軍機大臣密寄正月十三日

上諭徐延旭奏布置北甯各路防軍嚴加扼守各摺片

覽奏均悉方長華一軍著張樹聲催令迅即到防欽州一帶路僻難行據奏請飭廣東官軍由欽靈進攻海陽是否可行仍著張樹聲酌度辦理等因欽此二月初四日承准軍機大臣密寄正月十六日

上諭岑毓英徐延

旭先後奏陳調撥輪船由水陸進擊現在廣東福建防務吃緊且無大號得力兵輪無可徵調前據徐延旭奏請飭廣東由欽靈進規海陽仍著張樹聲遵照前旨酌度辦理等因欽此二月初七日承准軍機大臣密寄正月十八日

上諭方長華一軍可否由欽靈一帶前進著彭玉麟張樹聲斟酌地勢催令迅速到防毋得遲延等因

欽此仰見

朝廷出師維藩博徵羣策

廟謨深遠欽服曷勝伏查道員方長華一軍據報由南甯迅赴關

外業經另摺

奏報北甯軍情方緊勢不便折回粵東迂道欽靈以致緩不及事惟欽靈進兵之策臣等始籌

越事議者亦謂滇軍臨其上下西軍當其中東軍牽其後三省合謀計當出此嗣經考核地勢審察敵情乃知其有

未易行者蓋靈山境界廣西與越南並非接壤欽州出境至越南海陽之路迤邐由東北而指西南其右皆叢山

峻嶺鳥道崎嶇省志所謂十萬山也其左一徑斜通悉瀕大海廣安一省綦峙中道法人並守之以為犄角至於

海陽境內支河汊港百道紛歧尤非陸師所能逕達法人久居河內嗣又襲取南定興安甯平並攻奪山西各省

海陽為後路門戶設守極堅兵輪鐵艦環泊海口內外我軍沿海南行彼可以水師沿海相薄節節阻擊勢不能

前就令先下廣安渡江越河直抵海陽城下彼以堅輪大礮截我歸路環而擊我則近不足以牽掣山西河內之

法兵退反踴頓兵堅城之危道去冬北甯官軍三襲海陽雖入其外郭而不能得手實由於此然猶幸西軍以北

甯陸地為後路河道無多可以從容撤去無取道廣安沿海之險也若由欽州迤西尋陸路進兵必越十萬山中

緣崖穿谷輾轉而前仍須先抵諒山一帶乃達海陽非復間道出奇之意而轉輸之費力則百倍於鎮南關一路矣且疊奉 諭旨法如侵我駐軍之地即與開仗已明諭法人布告各國北寧興化兩路官兵與法軍相持日久兵力相接亦無啟衅內地之嫌欽州界外廣安海陽等處東省尚未駐軍近來廉瓊等處漁船偶入越洋海界

輒為法軍殺傷焚燬在粵洋則彼此相安是彼族不遽犯中國之意界限猶明若東軍鼓行而出彼或藉口敗盟亦鼓輪而東各口驕然似非計之得者至廣東兵力餉力之不逮水陸轉運之艱難猶其後焉者也徐延旭節次奏請調撥輪船嚴扼順化海防各口果使力能及此則東軍由欽州前進水陸徂征原為勝算方今閩粵籌防均當吃緊且無大號得力兵輪可以徵調久為 聖明所洞燭臣等再三酌度欽靈一路似未便以偏師嘗試轉

致有損無益所有方長華一軍礙難由欽靈進攻緣由臣等謹合詞據實覆陳伏乞

皇太后

皇上聖

鑒訓示謹

奏

進紮虎門外要隘摺光緒十年二月二十八日

奏為派營進紮虎門外沙角大角東西兩要隘以固前敵門戶恭摺仰祈

聖鑒事竊臣到防後會籌布置情

形業經

奏報並聲明現委總兵婁雲慶添募五營加緊訓練擬紮虎門前敵以厚兵力而扼要衝各在案其

時但就現有之兵力砲位先行布置故止議專守虎門昨慶字五營業已成軍臣督同婁雲慶等疊勘營地勘得虎門以外十餘里東有沙角西有大角兩山對峙實虎門外之第一要隘沙角大角兩嶺拱抱舊有砲臺急須修復此處嚴防則虎門可守而粵省可以無虞與其以重兵守後路似不若進紮前路要隘正所以堅守虎門也上年冬臣到防布置時該沙角大角二處有臺無礮現今所購之砲已從外洋運到省城可以分給十餘尊安設此二處砲臺臣軍仰荷 鴻慈飭部指撥的餉可收飽騰之效現已派令婁雲慶五營進紮沙角抽調上年冬添

紮烏村提督王永章所部之振字一營及總兵劉樹元之親軍一營又水師提臣方耀所部亦撥出一營計共三營分紮大角與方耀現守上下橫擋及威遠砲臺之軍勢成犄角互相援應又商督臣張樹聲撫臣倪文蔚鈞示

漢協副將吳迪文所辦漁園內惟紅單船二十隻配齊砲位給以口糧薪水即著吳迪文管帶名為靖海水師營給與閱防以資約束訓練而專責任該營分泊沙角大角以便水陸相依為保固省城門戶之計其餘長洲大黃清沙路魚珠烏村等隘除

奏明抽調道員王之春統帶四營別防要郡外餘均照前議辦理所有派營進紮沙角大角虎門前敵要隘緣由謹會同兩廣督臣張樹聲廣東撫臣倪文蔚恭摺馳陳伏乞

皇上聖鑒訓示謹

奏

皇太后

會奏籌防瓊州摺光緒十年三月十二日

奏為遵

旨籌備瓊州防務情形恭摺覆陳仰祈

聖鑒事竊臣等於光緒十年三月十七日承准軍機大

臣密寄二月二十九日奉

上諭昨據李鴻章電報法兵已攻取太原華兵死傷甚眾法人逞兵未已而且勒索

費之說瓊州防務愈形吃重著彭玉麟張樹聲倪文蔚速籌備禦如兵力不敷即行添調前往以資厚集並將各路團防加意聯絡藉壯聲威以佐兵力所不及等因欽此仰惟

聖主屢懷粵海訓示周詳曷勝悚感當即欽

遵密飭瓊州鎮道妥速籌備伏查去年十二月欽奉

諭旨以瓊州備禦空虛飭臣玉麟前往扼守即經臣等

奏派臣玉麟總理營務處現署雷瓊道王之春率所部毅字湘勇二營併抽調署南韶連鎮總兵鄭紹忠所部安

勇二營併歸該道統帶赴瓊力籌防堵嗣據王之春到瓊後會同署瓊州鎮總兵吳全美周厯察勘該府所屬十

縣三州除定安一縣外餘皆瀕海港口紛歧大兵輪之可停泊小兵輪之可登岸者蓋屈指難數若處處設防非

一二萬雄師不足以資分布該鎮道等以府城為根本重地擇要布置以扼其衝稟請添募紅單船水師兩營分

泊各港嚴加備禦臣等立即批飭照辦吳全美所部原駐欽州東安勇一營亦經該鎮調赴瓊州復經東臣等飭

令添募一營與王之春所部各營合力分防至前署雷瓊道劉鎮楚原募鎮字營湘勇一千二百五十人現已令

王之春一併接統瓊州鎮標額兵一千數百名亦經吳全美簡汰訓練各屬團練先經臣等奏派紳士戶部主事

潘存倡率辦理現又照會前福建汀延邵鎮總兵林宜華戶部主事陳喬森幫同潘存籌辦皆能踴躍從事竊惟

瓊州孤縣巨浸為水師制勝之地非有堅輪鐵甲立大枝海軍於雷瓊之間防守殊無把握臣樹聲已節次奏陳仰懇 俯鑒今越南北甯等省相繼不守法人之氣愈益驕驕有逞兵內犯踞地索費之計瓊州距越之海防

僅六百餘里東道首要固彼族所為垂涎我既無水師雄視海上銷其窺伺之謀惟有截之港口扼其登岸之一法已令多備水雷安設各口以阻小輪船舶板近岸之路並慮備多力分又飭王之春添募壯勇二營以資分扼統計瓊防除額兵外共有湘粵水陸練勇六千數百人瓊州產米不多平時皆仰給於北海之販運即柴薪亦多購自鄰封萬一有警敵船橫海接濟尤難業經寬籌餉銀多撥軍火以備緩急並令該鎮道多購米薪預為儲積密備快艇以通文報雖成敗利鈍非所敢期而心所能及力所能為不敢不督飭該鎮道竭力圖維以期同仇敵愾上紓 宵旰南顧之憂所有遵 旨籌備瓊州防務情形臣等謹合詞恭摺具 奏伏乞 皇太后

皇上聖鑒訓示謹 奏

籌辦廣東守禦情形摺光緒十年四月二十八日

奏為嚴密籌辦廣東守禦情形遵

旨覆陳仰祈

聖鑒事竊臣於四月十七日接督臣張樹聲咨承准軍

機大臣密寄光緒十年三月二十六日奉

上諭總理各國事務衙門昨據道員邵友濂電報德國施繆譚官

云洋行接廈門電報法國提督帶兵船八隻過廈門向北開駛等語法人連陷越南北甯等省其勢甚張彼以兵

船來華恫喝要求自在意中沿海各處亟應妥籌備豫著李鴻章曾國荃彭玉麟穆圖善何璟張樹聲衛榮光劉

東璋張兆棟陳士杰倪文蔚吳大澂飭令防軍加緊訓練於沿海各要隘力籌守禦務臻嚴密瓊州臺灣孤懸海

外久為被族所覬覦有欲據為質藉索兵費之說倘有疎虞辦理益形棘手著彭玉麟穆圖善何璟張樹聲張兆

棟倪文蔚督飭將領實力籌防總期有備無患際此事機緊要正我君臣卧薪嘗胆之時該大臣等務當振刷精

神竭誠籌辦用副委任仍宜持以鎮靜不得稍涉張皇是為至要該國兵船北史是否確實著即探明具奏通政

使司參議廷茂奏請飭調吳長慶一軍移紮金州等語吳長慶統率所部駐紮朝鮮應否將該軍調回擇要扼守

著李鴻章體察情形奏明辦理原摺著鈔給閱看御史趙爾巽奏敬陳海防戰守機宜等語著該大臣等斟酌妥辦原摺均著鈔給閱看將此由六百里各密諭知之欽此臣按法夷自陷越南之北甯太原興化等省其勢日張肆其狡焉思逞之心自不無窺伺中華之憂寧省三面瀕海而西南陸地又與越南毗連故防務緊要尤以粵東為先除各要害有已由督臣張樹聲早經籌防外臣上年冬抵粵巡閱各海口細察形勢自宜以虎門為入省第一要隘黃埔沙路長河魚珠島相次之大黃滬南石頭海心岡中流砥柱又次之臣已於虎門大角沙角海心岡烏村大黃滬等處安置各營節節防守前經奏明在案目下臣不時巡視督飭要緊慶陶定昇王永章劉樹元及各營有官等演習洋槍器械以期精熟測量地勢遠近以期取遠命中砲臺之頽壞者修之不如式者改之於砲臺後開劈山洞土港暗通小門以藏兵勇使得隱蔽其身有恃無恐以便專身攻敵踴躍圻隴山凹以俟臨事潛伏奇兵出敵不意乘間狙擊砲臺左右餘基築鞏互堅厚上牆前掘深壕使各砲臺勇丁得在牆內通行聯絡聲勢另開便門出隊為游擊之師勝則隨機策應不勝則退守於牆內不致為敵所乘砲臺外堆積海沙高與砲臺相埒臨時以水淋透可禦開花砲子此與御史趙爾巽所奏砲臺覆宜節節遮攔陸戰分路雕擊宜散不宜聚之說不謀而合此虎門至省城一切防務之情形也查虎門以西曰西海如新會香山順德等縣所屬之橫門斗門厓門蕉門虎跳門磨刀門江門等口四通八達港汊紛歧輪鐵甲船雖不能直駛而入小輪船則隨處可以登岸臣會商督撫臣札飭地方州縣文武官辦理漁團鄉團實力講求選擇廉幹紳耆以董率之挑選丁壯以訓練之並頒發章程撥給槍械平時則緝捕土匪以銷內患有警則據守險要以捍外侵舉辦現已數月若能歷久不懈自可收堅壁清野之效陽春縣知縣蕭丙堃招撫海盜梁耀劉甜黃六崔任等頭目三十九名隨帶散盜二百餘名其人均剽悍輕趨習於戰鬥而瀕海瘴雨夾風出沒潮汐又其性所能耐臣已商督臣張樹聲撫臣倪文蔚將該投誠梁耀等編為靖海營水師以之防堵海口要隘自較新募勇丁尤為得力借此羈縻不使為盜兼可作眼線緝拿平時盜案以靖地方至瓊州廉州均逼近越南臣亦會商督撫臣為署雷瓊道王之春高廉鎮張得

祿各添兩營俱經陸續遣赴防次並飭於該郡縣實行團練互相聯絡以壯聲威矣此省城及虎門以外各防務之情形也臣統籌粵省全局沿海及各處要隘均已粗有布置萬一法夷犯順尚堪一戰惟臣初擬設一二枝遊戈之軍以為聞警聲援之用徒以餉項無出遵奉辦此時防務日形緊急應即設法籌募又臣調來兩江合字三營由淮陽鎮章合才派提督陶定昇統帶到粵臣飭其分紮大黃滘及海心兩砲臺以固省城堂與兩江督臣左宗棠以為廣東現無軍事兩次飭章合才飛檄致陶定昇調該三營附載輪船返回兩江臣方欲招集新軍若更調去此三營守禦必益形虛薄是則斷不可輕動者耳法夷提督赴津粵中亦聞此說究未詳其船隻之多寡與其要求之虛實今果由廈門北上其必虛聲恫喝要求無稽事在意中伏懇 密飭北洋大臣務須正詞拒絕折彼奸詐萬不可就其狡謀許以兵費蓋犬羊貪得之心有何既極此次得志而去將來必益肆其欺凌我若徒顧目前之苟安必貽日後之隱患若夫損 國威糜鉅帑又不待言矣伏思 朝廷神算無遺洞燭萬里必早有以處此方今時際艱難 皇上宵旰焦勞憂深南顧凡有血氣莫不思敵愾同仇上紓 宸廑況臣忝竊高位兼任兵權雖老病侵尋而天良未泯何敢瞬息偷安以取咎戾惟有竭盡心力知無不為與督臣張樹聲撫臣倪文蔚和衷共濟遇事熟商總期諸臻妥善以弭外患而靖邊疆所有臣於廣東竭誠籌防情形謹遵

旨恭摺覆

奏伏乞

皇太后

皇上聖鑒訓示謹

奏

力阻和議片光緒十年四月二十八日

再臣正封摺間適接督臣張樹聲緘致總署電音得悉署直隸督臣李鴻章方與法酋議款聞之不勝駭異伏維法夷犯順率土同仇臣昨奉光緒十年三月二十六日 上諭飭臣等振刷精神竭誠籌辦防務臣當宣示各軍莫不踴躍歡呼激昂思奮乃南數日而忽有議款之舉得毋阻赴義之心而視敵愾之氣況今日法夷有斷斷乎不可款者臣素愚戇忘其冒昧有不容已於言者請為 皇太后 皇上上一陳之法夷無端生衅或

我屬國及我出師保護又復肆其承突撓敗我師迄今並未大加懲創遽與議和何以張 國威示天下不可

許者一法夷並未受創緒然請款是必中藏詭譎或怠我師而徐乘其後或緩我謀而誤以多方其害無窮不可許者二既與議款不索兵費更為巨測該夷惟利是視急棄日前所索巨萬之費不言但言越境通商其中不免有詐恐將來必有十倍取償於後者瘠中華以奉島夷飾目前以釀邊患不可許者三以一外強中乾之法夷憑陵我藩服吞噬我疆土堂堂中華不勤遠略不問其罪轉降心相從以就其和使之此次得志而效黷法夷者必猖狂然環向而起是款一法夷而轉來無數法夷也庫謀曰滋隱憂方大不可許者四雲南物產富饒五金之礦翠玉之璞豔稱於世久為西人所垂涎若與議款必由蒙自以內許其通商迄為日既久形勢險隘彼皆周知廣傳邪教以張羽翼一旦竊發不僅通商將何以支不可許者五此五不可者人人知之儻漫不加察貿貿焉與議和以為國計萬全臣固未敢信也法夷自通商以來前於天津教堂一案即思啟端以償其所大欲適為普人所窘中止旋即狡謀越南為自強之計我中華果以全力決戰審用兵籌餉分量彼族萬難久持故先為恫喝以速其和又貌為恭順以工其術其實鬼蜮伎倆窮矣此揣敵情而可戰者一也我朝以神武開基將帥得人速戰前古嗣平髮捻之亂亦忠勇輩出賈其餘勇似足定邊憶前議防俄之時奉旨著京外保薦人材即以將才不易存者什一為慮再閱數年老成凋謝盡矣雖攘外不必定用安內之才而有識究須有膽曷若及時精選宿將俾講求以柔克剛以散敵整之法以盡其長此論將才而可戰者二也道光年間夷釁初開廣東三元里圍練義聲至今猶在此外各省因事激憤之案層見叠出亦見民間不平之氣不可遏抑越南劉義亦中華民也

寬伏荒裔自全不暇猶能尚義屢殲法夷各省山陬僻壤不乏英豪聞與夷戰莫不聽雞起舞共發雄心願效死力此察民情而可戰者三也查萬國公法有可節取者在戰分義與不義一節如興戰不義傷害天理不獨可以理喻並可以力止等情深與齊人伐燕之義暗合亦足徵萬國之公也我朝廷一面通飭各督撫臣大張曉諭於通商和好各國極力保護專與法夷絕好准各義民誅其天主教士燬其天主鬼樓罷其駐京法使撤其生意馬頭既銷萌蘖不虞支蔓此採公法而可戰者四也語云師直為壯曲為老今兵端自法夷開窮兵黷戰掠地

爭城欺侮太甚實為萬國公法所不容宜歷數法夷罪狀布告中外使咸知理曲在彼直在我不得已而用兵代
罪明有日月幽有鬼神共鑒此衷應蒙點佑此卜天理可戰而決必勝者五也有此五可亦人人知之儻失此機
宜恐我中華永無自強之日其將如天下後世之非議何伏乞我

朝廷乾剛獨斷嚴飭沿海各疆吏及各將

領防務不可一刻稍懈尤須洗心易慮卧薪嘗膽各矢天良修矛階作憤切同仇以興法夷從事臣雖衰朽無似

斷不敢惜此病軀殘喘稍存畏惠尚當獎率將士為各軍先惟宜和宜戰大局攸關

聖明洞鑒自有權衡原

非臣下所敢妄議微臣老病昏眊在軍言軍謹冒昧將所有不可款而可戰緣由披瀝附片具陳不勝惶悚待罪

之至仰祈

皇太后

皇上聖鑒訓示謹

奏

安插投誠台匪片光緒十年四月二十八日

再臣承准軍機大臣密寄光緒十年三月十七日奉

上諭劉秉璋奏台匪金滿自投誠以來野性難盡化

現經調越粵東如能立功自贖或粵省撤防萬不可仍令回浙以致別生枝節請飭彭玉麟俟海防事竣或就近

安插或長留水師營內差委等語著彭玉麟察度情形妥為辦理毋任回浙再生事端以弭後患等因欽此伏讀

之下仰見

聖謨深遠慮患未形莫名欽服臣上年自欽奉辦理廣東海防之命念沿海地方匪徒不時滋事

殊非所以整頓防務之道因思金滿經臣招撫悔罪投誠當不致有反覆然台州等處地瘠民獷聚眾剽掠之案

時所不免或者假金滿之名以相號召必至轉生事端故於赴粵途次緘商浙江撫臣劉秉璋調金滿來粵以聽

委用蓋臣區區之愚未嘗不慮及此也今年三月初九日准劉秉璋咨飭候補知縣蔡秉澄孝廉方正謝夢蘭督

同勇丁兩棚押送金滿來粵防營次其勇丁及勇夫等二十六名因水土不宜經臣酌給川資委都司章文彬護

送回浙並咨達劉秉璋俾仍歸浙江營伍金滿現留臣營朝夕察看頗知感激

朝廷寬大之恩亟思自效其

心似屬無他嗣後如有軍務倘能因事立功尚乞

逾格鴻慈許以進用以示始終曲全之意臣亦當隨時警

策激勵以堅其反正之心至於粵省撤防屆時臣當悉心籌度妥為安插或即其五品軍功歸長江提標以外委

候補不令必致有他虞以至上煩

宸廑也謹附片覆陳伏祈

聖鑒訓示謹

奏

會奏廣東積弊摺片結十年五月二十一日

奏為陳陳廣東吏治軍政民風積弊請

旨申諭俾疆臣得以逐一澈查興革以修內治而固本根恭摺仰祈

聖鑒事竊臣王麟奉

命籌辦海防在粵經歲粵中之政治風俗目見耳聞情所析粵本不可富可強之

地徒以積習相沿流弊百出已非一朝一夕之故臣樹聲前次在任思竭庸愚力圖補救弊重材輕未能挽回萬

一去年回任即擬條析遞陳請

旨飭辦緣法越構兵海防事至新置緩國今以片陳請仰蒙

恩准開

故交卸在即不敢忽然臣文蔚到任三月於吏治軍政民風考察所得亦應有所敷陳現在海防辦理粗有頭緒

正宜講求飭吏整軍治民諸政漸除積弊以立自強根本臣等會商意見相同謹分列十餘款遞陳懇如蒙

採納俟署督臣張之洞到粵臣文蔚當會同逐條察核力挽頽波蓋必先治內而後可以援外先察吏而後可以

安民如但調兵設防是第治其末塞其流非正本清源之道也不揆冒昧敬為

皇太后

皇上陳之

一水師宜練也廣東為南海廣疆水師提督駐紮虎門為海防而設然通省並無成隊堅利大號兵輪可以禦

敵者從前初辦海防所費不貲曾無濟於實用近年竭力布置修築各處砲臺添購各臺砲位而庫款久匱海口

紛歧防務實未能嚴密良由水師未練提督亦未以水師為專責也夫洋人之陸兵不足慮水師則宜效所長彼

其船堅砲利誠非一日所能猝辦矣臣樹聲節次擬議籌款奏奉

諭旨飭部議准照辦比以防餉吃緊製船

之款均經挪用未能舉行亟宜及時另籌巨款購造戰艦使足自成一隊責成水師提督專意訓練但能皆以水

師為身心性命之學自將弁以至舵工砲手莫不童而習之遇風浪而不驚震雷震而不懼仍照臣王麟前所

奏辦長江水師例都守以下哨弁皆在本船住宿無事不准登岸官有在岸居者參究兵有在岸宿者革糧悉

當以船為衙署視戰船砲械不啻傳家之世業官階遷轉不出水師如此實力操練以戰縱不足以守必有餘方

為一勞永逸之計總之不恃海之無警恃吾有以防之庶不至有名無實耳

一陸營宜整也廣東賭風最甚營員向多庇賭收規以規多者為優缺鎮將或不得人則鑽營賄進百弊俱生營伍何由整肅臣樹聲歷年三令五申自總兵以下節經擇尤參辦惟積重既深稍縱即逝應請 飭新任督臣認真整飭庶營伍日有起色前督臣瑞麟裁減三成額兵每年節省額餉米銀約三十餘萬本議清理欠餉後為練兵加餉但以協撥各餉藩庫入不敷出率皆隨時移挪此項裁兵餉銀並未專款提存前督臣劉坤一批選兵丁成營訓練轉須另籌練餉且練營仍多循綠營舊習殊鮮成效亟應清出裁兵餉銀做照曾國藩直隸練兵章程以湘淮勇營之法練經制之兵則兵為有用而餉不虛靡矣

一教民宜別也自和約許令外洋傳教大為世道人心之害無賴之徒貪其小利誘入教中遂為遁逃之藪凡奸民訟棍在教中者地方官不得過問因而激成事端焚毀教堂之案不一而足今既不能禁其入教則請以明許暗禁之法行之一曰別編教民戶冊二曰州縣官給以教民小區釘懸門首三曰凡教民必令異其服色用短裝不穿長衣凡所以動其羞惡之心而絕其招徠之路或慮傳教之士不以為然則有說以折之彼既勸民入教入教之民自當表異於眾若既入教而不肯自承是謂恥教恥教者西士所不許也且入教之民與眾無所區別地方官亦無由為之保全故特編戶籍以陰識之給匾額以明表之異服色以彰顯之假使對教師入會堂則自甘入教對外人則謹莫如深甚且以為大辱西士亦何貴有此入教之民哉如此折之彼此無詞以對此法一行已入教者不敢肆其欺陵未入教者不敢輕試而官吏亦可察人數之多寡矣臣玉麟竊以此法各省可行當自粵始應請 飭督臣撫臣通飭各州縣多製粉書小匾如法辦理其風必定衰息至教士不許干預有司獄訟天津條約已申明之無如州縣畏事者多故隱忍遷就而莫能自振耳

倉儲宜備也粵民食米多恃外洋城內無論貧富不存旬日之糧前經臣等會同奏明蒙 恩准往江浙及

廣西產米之區採辦免收釐稅在案軍民同深感戴惟江浙米價頗昂商民不願往採廣西軍餉半賴米釐敷用又未便挹彼注茲當經臣樹聲臣文蔚飭司先後籌撥銀六萬兩辦理官運委員先往江浙江西浙江兩湖福建

等省採買穀米並勘定省城釐務局後身地基寬大可以修建倉廩以備收囤官運米穀查粵東地方卑濕因米易於霉變現在官運已飭委員多購穀粒如果經理得人照曬以時亦無大虧折惟粵省戶口繁盛官倉之儲積必不能敷萬姓之取求一旦海上有事糧無來源何以定人心而濟軍食尤亟宜曉諭紳商家自為備各儲半年之糧以期有備無患足食先於足兵實根本之計也

一瓊州宜圖也瓊縣海外矣瘴尤甚內地之人視為畏途牧令到彼以其瘠苦荒遠罕能自勵全境內黎外海州縣存傳舍之見不為地方求長久治安黎患難除動煩兵力現在法人在越南北圻距瓊僅數百里彼欲有事東方此實必爭之地中國宜及是時實力經營雷瓊道員必擇文武兼資有雄才大畧者任之所屬文武地方官皆令遴舉賢才略參辟召之意一切兵刑錢穀勿以內地成例相拘束現有善防大軍用明臣海瑞卸濬之議開通五指山十字路設立都邑講求樹藝開採礦產大利既興積款購置兵輪鐵艦沿海港口本有可作船塢之處能續成水軍一枝則南海屏藩永永鞏固矣伏乞 聖裁採擇施行

一鹽務宜變也粵鹽省河各埠餉課現尚能按額全完依限奏銷漸趨各埠則自道光初年以來疲滯已深節次展緩奏銷近年雖竭力整頓而福建江西私多銷帶大小河商販賣足炭及難支廣西臨全大江各埠亦復私鹽充斥查道光年間准北鹽務敝壞已極陶樹改行票鹽咸豐年間江路梗阻准南鹽片引不行同治初年曾國藩改行票鹽同治年間福建鹽務極疲左宗棠改行票鹽皆所至立應成效大著至今猶守其法擬請援照成案將粵鹽改行票運必當大有起色或將漸橋各埠先行試辦以次推行伏候 聖裁飭部議行

一會匪宜清也粵中華洋錯居人心浮動愚民昧義趨利無忌之徒倡為天地會三點會等名目編造邪說狂誕不經拜會誦經形跡詭密轉輾煽惑趨之若鶩西路則高廉一帶東路則自惠潮嘉各府州以及北江韶州各屬外連江西福建各處皆有頭目潛相糾結已數十年於茲尤以香港澳門洋界為窟穴之數數千里之間黨類徧布聲息相通臣樹聲前次在任曾通飭各屬嚴密查辦在長樂縣破獲潛謀滋事之首要多人近年高州惠州暨

次蠢動雖經懲創根株尚深往者鑒之禍幾遍天下推究原起則亦粵中會匪潛之勵也應請 旨由督撫臣督飭各屬力行保甲嚴拏頭目盡法整治以示大戒而散其黨並 飭下江西福建督撫臣一體查辦以靖無形之巨患

一沙田宜查也粵東各屬沙坦自康熙年間清丈後百數十年來承恩升科不下萬餘頃續又歸屯變升覓荒抵補頭緒愈繁有前後編征稅則不同有老田與新沙田界參差有小沙附大沙土名各異其間應否補升是否缺溢曾否升科均無從稽核雖有請給印照而年湮代遠輾轉變遷或割賣截分或影射虛偽或推移飛佔大抵皆沙棍把持豪強兼并書吏蔽混百弊叢生爭端紛起纏紉糾門永無清給之時上虧 國課下病民生雖經疊

次奏明查清迄未能澈底勘丈積弊無自而除亟應遴派廉正明練大員會同司道提綱絜綱縷析條分逐一清丈給照如有豪紳土棍從中阻撓即行奏參嚴辦使經界正而賦稅足則小民亦同沾樂利矣

一墳墓宜嚴也粵東墳墓多係官山民葬故有碑碣而無契券民間惑於風水之說相率停棺不葬或已葬所棺檢骨另裝骸蟻謀地不成暴露原野甚至兄弟相爭一骸分葬數處更有奸滑之徒覬覦吉壤在他人已葬墳內或預埋空罈或暗藏碑記出名控爭迨官履勘則指空罈為骸被掘據碑記為有確憑反誣原葬之家謀佔句結土棍賄屬訟師上控京控纏訟不休往往釀成械鬥巨案按厥由來實因官山無稅人皆可圖首域附郭墳冢壘壘近冢居民俗謂之山狗若輩私將官山培築墳墓轉售得價名為工本銀兩署券名為送帖買主不能鈐稅與訟仍屬無憑並有已葬墳地子孫遠客未歸山狗始則毀其墓碑繼則平其墳冢另起墳墓復行售賣忍心害理莫此為尤光緒七年 臣文蔚在臬司任內詳請督撫 臣設立墳山公所清查注冊已得數十萬冢此風稍戢然有外盜竄掘墳之案仍復層見疊出應通飭各州縣申明禁令嚴禁各狗務期有犯必獲獲犯必辦以挽統風一水利宜善也粵東環海為疆三江匯注西江容納百派尤源遠流長皆以廣州為歸墟之所從前海口深通江面寬濶建瓴順軌尚鮮泛濫嗣以下流香山新會東莞新安順德番禺各屬每於沿海淺水堵石築壩攔阻泥沙

淤成田畝於是羣起爭利東以斥鹵報西以草坦升園外加壩田外生田河面日盛出水日艱大雨時行各江咸漲上流各屬動遭水患決圍潰隄間歲相望請援照乾隆十三年湖北巡撫彭祖葵奏禁私垸灘地嘉慶七年湖南巡撫馬慧裕奏禁增築湖田隄埂辦法曉諭各屬沙坦以現在報墾成田者定為限制嗣後永遠禁止添築石壩基圍以利宣洩而慶豐穰

以上十條皆臣等見聞所得籌議所及舉其卓卓大者皆係歷年積弊關乎吏治之汙隆民生之休戚而地方之治亂繫焉夫從前洋務初起大局貽誤自粵東始則今日維持大局亦必自粵東始蓋必能知人而後可以察吏能察吏而後可以安民能安民而後可以治內能治內而後可以攘外此正本清源之道也然積弊已深動多牽掣往往欲興一利而百計撓阻欲除一弊而謗議叢生眾口燥金是非莫判必賴聖明主持飭下辦理庶疆吏得以措手從此風清弊絕公道大彰措正施行勵精圖治凡事必計久遠不徒敷衍目前內治修而遠人服粵省幸甚天下幸甚所有粵中積弊臣等謹就所見合詞專摺條陳伏乞

再陳粵省積弊摺光緒十年五月二十一日

皇太后

皇上聖鑒施行謹

奏

奏為敬陳粵省積弊尚有未盡事宜謹就見聞所及恭摺陳仰祈

聖鑒事竊臣到粵以來業逾半載時艱

莫濟株守籌防雖治軍政者初無與乎吏事善吏務者並無涉乎民情然抵防數月所見所聞粵中積習如曰下江河無所底止夫內不治而欲以攘外臣固未見其可也竊維粵東土地富饒人物繁庶即值有事之秋善兵籌餉尚非難事惟當其事者不患財用之不足而患徒資冒濫樽節之無方亦不患流弊之太深而患徒事具文隱徇之未絕臣留心察訪雖未盡窮底蘊亦得畧悉端崖思挽救而未能欲緘默而不可除臣所已商之督撫臣逐條具

奏外更有諮詢所得不宜墜於

上聞者復條具於後謹為

皇太后

皇上續陳之

一捐攤宜覈也外省地方公用有格於成例不能作正開銷者輒令州縣捐攤此亦各省皆然顧未有如粵東之甚者如道光二十八年清查案内查出各屬虧短無著各款

奏明由各屬捐廉歸補又如州縣錢糧官墊民

欠分年征補不足即歸本缺流攤此外地方一切公用勢不能免而又例不准銷者或遽年捐解或按缺勻攤繁缺州縣或數逾千金之多即簡小之缺亦須五六百金或三四百金不等若攤賠民欠則數目多者萬餘金少者亦千數百金前撫臣蔣益澧奏減米羨即議將捐攤各項大為減裁近年以來亦間有停攤減捐之款無如所減無幾款目尚繁州縣仍不能文非挪移庫款浸成虧空即藉詞賠累巧取於民名為州縣捐廉實則下剝民膏上虧公帑粵東更治之壞其故尚不止此一端而此一端之害要為最鉅若不急圖補救必致公私俱敝官民兩傷其補救之法非豁免以前捐攤不足蘇州縣苦累苦累既深貪黷因之而起故州縣未得缺則望得缺既得缺則又淪入苦海交代紛紛謹愿者則告貸無門致扣留間居閱十數年不能清算欲仕不能欲歸不得坐以待斃久之典賣一空喪殮不給家破身亡子孫流落勢所必然巧滑者於到任莅官之日先存一預備交代之心妄取諸民公行賄賂枉法貪贓無惡不作民不聊生矣且性本愚直非為州縣請命實為民生請命應請 旨飭督撫臣查清實報將州縣以前捐攤無論多少一概豁免禁止上司收受供應節籌禮以及門包等費用不准再有捐攤名目則州縣之苦累稍蘇然後責以潔己勤民於吏治實大有關繫倘州縣仍不自愛視民如魚肉者立即嚴參究辦庶幾官清民安天下幸甚禍亂不萌矣此正本清源之道不獨廣東為然亦各省通病而廣東尤亟宜整理者也

一釐金宜核也廣東官山府海物產甲於天下而釐金所入僅及一中省者以當局者不肯實心任事剔弊釐奸半歸中飽也除瓊州潮州未設釐廠外其餘七府皆有釐廠每廠有總辦幫辦而總領於省局及督糧道釐局之弊皆司事及巡丁為之即如六大廠每廠約用司事及巡攔三四十人司事巡攔與商賈勾通私自賣放總辦幫辦均有月規亦不常親自到廠一切公事悉聽巡攔司事之所為而巡攔司事又多由賄賂而得聞其缺價有至五六百洋圓者夫一司巡有何榮貴非有大利存乎其中誰肯以重價充此賤役耶廠員既有所私一切不復過問而其所謂總辦幫辦者又或由請託或由賄進上既以此為調劑之端下即以此作生財之路雖立比較之法

入數短絀總以來路閉塞為辭聞各廠乾修乾俸不一而足省局均置之不問其中即有秉公潔己之員上官亦眾人視之從無激勸之事此弊竇之所以日滋也請飭督撫臣嚴飭省局明定章程填發三聯印票設立旬

報其總辦幫辦不到廠者立即撤之總理省局道員遇旬報到時隨查核分別功過該局員能每月比較有贏者則記功每年有贏者則留辦有不足而太短少者則立撤若查有實弊虧空則參辦臣在浙江查有紹興府百官地方一釐局向來疲弊所收釐金有缺無贏經藩司德馨遴選升用同知候補道判李承先接辦月有餘歲更有餘已留辦數載皆有贏無缺豈人人辦此局而虧空李承先辦此局顧另有術而贏餘耶不過辦理認真一意潔已奉公所用司事巡丁得人無弊而已即於餉需大有裨益粵東果能實力整頓歲可增餉百萬而總辦幫辦仍請酌加薪水藉養其廉庶積弊可期一洗矣

一出入款項宜清也臣聞粵東出入款項侵漁浮冒極其混雜每年入款之多約在五六百萬猶有雜項不報部之款甚多而正款開銷不過三四百萬然猶時告空乏乞貸他人者一由於糜費之太多一由於清查之未實夫動支各項豈盡實用實銷然如數進酒席即報一千餘金移砲數尊亦報六七百金無論吏蝕官侵言之亦殊可駭其他虧漏隱報移東補西不問而知其糜費也各局公事挪洩牽混源本不清如善後釐金機器軍裝輪船等局一切採辦支應不免浮開濫費種種糾纏弊端百出而釐金一項侵漏尤多聞歸公者尚不及十之四五善後局中之弊以句結武員為大端遇有支領款項有請託則准無請託則駁把持侵蝕無所不為而從中挪借需索百弊叢生噉嗜人言必非無因而至輪船虛費大宗則在煤斤機器軍火軍裝積弊總歸支應或串通一氣或暗地分肥則清查未實也統計各端非並為整頓清查不能杜弊歸源有裨實用應請旨飭下督撫臣實力清查不避嫌怨務使歷年積款和盤托出核其疏漏清其界限揭其檔冊逐件核對一目了然庶幾款有所歸把持侵蝕者無所施其伎倆責無可貸因循徇隱者不能任其含糊臣非敢盡信道路之謠傳而當此時事艱難費用浩大苟有裨於國計無損於民生者即思挽回以希補救於萬一除一其之美即歸一事之公是在當事者

能破除情面耳

一補署宜公也侯補人員約有三種曰正途曰勞績曰捐納粵中大小官以千餘計皆有資格之先後當差之勤情按冊可稽他省多用輪補輪委法眾稱公允粵省則專用酌補酌委既曰酌則資格年勞皆可不論而專視大吏之好惡大吏所賞拔者固不乏有用之才而或取其應對之敏捷供億之周隆或有請託與援或有年世鄉誼此差甫卸彼篆復權一省中大吏注意者只此一二十人餘皆束之高閣有選缺數年而不得到任有到省十年而不得一差者豈所用者皆賢所棄者皆不肖哉縱或遞之又久與以差缺而積累既深雖欲潔己奉公而不能此民生所以日蹙而怨謫所以日滋也應請 飭下督撫臣轉飭藩司凡補署悉循資格輪班序用至公至嚴公則不可干以私嚴則無所容其弊所用者或式而不效或更有劣蹟立即撤之參之如必須因地擇人則每十缺留二三缺為酌補地步總不可為人而擇地如此則舉措得宜而民心悅服外患不足憂矣

一差委宜均也粵省佐貳雜候補者佐約千餘人不外勞績捐納當用輪委之法以示均平粵中局事甚多莫不需員差遣故指捐雖多而酌派均勻尚堪安頓第間有巧宦之流半係紈袴子弟平日與幕府官場廣通聲氣指捐此地倩人驗看不出戶庭居然美官而差事之優己先賞緣倖倖一朝稟到札委隨來酌委記功儘先調劑更無論矣又有先充釐廠司巡分獲贏餘納捐一職洎由此職洊充幫辦總辦餘利更多貽捐晉捐不過數百金遂廁用通之列其人應酬奔競是其所長謹愿者何能望其項背屢得美差是以捐餉為進身之階而其取償於公家者耗餉且十倍也此等取巧之員曾經委過即應查明停委俾謹愿者可望差使總之為上官者果能隨事留心則流品之清濁聲明之優劣才具之短長不難了然在目而又隨才器使位置得宜雋異者庶脫穎而出如是可無乏才之歎亦無壅擠之虞矣

一劣幕宜驅也定例疆臣幕友不准換官而不換幕上官亦不准薦幕友於屬員粵東近來不然如前撫幕友沈彬既居撫幕又兼廣州府及廣州通判之幕其子沈校又居南海縣幕其門徒數十則分薦入各州縣例案未必